

欽定熱河志

山 四

各屬有名無考諸山。

按：承德府屬境內名山，有載在史傳今古殊稱者，即往證今，雖形勢方位，粗有可指，而稱名不符，未宜牽率，亦不便刪略，彙編如左，以俟審證云。

鮮卑山 《後漢書·鮮卑傳》：鮮卑者，東胡之支別。依鮮卑山。杜佑《通典》：柳城有鮮卑山，在縣東南二百里，棘城之東。塞外亦有鮮卑山，在遼西之一百里，未詳孰是。

按：《通典》于鮮卑山二說并存。在杜佑時已莫定所在。《太平寰宇記》諸書皆兩仍其說。《一統志》原本據《後漢書》鮮卑以季春月大會於饒樂水上，謂遼之中京大定府在饒樂水南，則古鮮卑山當相去不遠。饒樂水為今英金河，流經赤峰、建昌、朝陽三縣地，則鮮卑山方位究難據以審定也。

赤山 《後漢書·烏桓傳》：漁陽 赤山 烏桓數寇上谷。

按：唐張九齡有《賀赤山北無賊狀》，漁陽與今承德府灤平、豐寧縣相直。是赤山當在今承德府本境及灤平、豐寧二縣境內，而諸處俱無之。建昌縣境有赤山及大赤山，但其方位不合，難以傳會。

牛尾谷 《十六國春秋·前燕錄》：段蘭攻柳城，慕容汗及封奕等救之，與蘭遇於牛尾谷。

按：柳城屬今建昌縣。牛尾谷當在建昌縣南境。

馬兜山 《十六國春秋·前燕錄》：慕容皝以段遼將復至，於柳城左右設伏以待之，遣封奕率騎數千，伏於馬兜山。

按：《漢書·地理志》稱馬首山在柳城西南，段氏之伐柳城，必從西南而至，疑馬首山即馬兜山。蓋馬首與馬頭同義，頭與兜又音近，而《太平寰宇記》謂柳城縣有馬首山，遼之要路，據此當在今建昌縣南境。

黃榆谷 《十六國春秋·後燕錄》：慕容寶宿廣都黃榆谷，清河王會夜詣寶，行十餘里，復走赴其軍，勒兵攻寶，寶帥騎馳二百里，晡時至龍城。

按：龍城為今朝陽縣治，黃榆谷當在今朝陽縣治南二百餘里。

索莫汗陁 《十六國春秋·後燕錄》：慕容寶自石城還龍城，至索莫汗陁，去龍城四十里。

按：索莫汗陁當在今朝陽縣治南四十里。

板陁 《十六國春秋·後燕錄》：李旱棄軍奔走，至板陁復還。

按：此當在今建昌縣境。

突門嶺 《魏書·太宗紀》：魏主東巡至於濡源及甘松，遣精騎襲馮跋於和龍，魏主屯突門嶺待之。

按：《方輿紀要》謂突門嶺在大寧西南，當在今平泉州南境。

鷄鳴山 《魏書·地形志》：昌黎郡廣興縣有鷄鳴山。

按：魏昌黎郡廣興縣地屬今朝陽縣，山當在朝陽縣東南境。

鹿頭山 《魏書·地形志》：昌黎郡定荒縣有鹿頭山。

按：《水經注》謂白鹿山即白狼山，《元和郡縣志》又謂白狼山一名鹿首山，是鹿首山、白鹿山皆即白狼山之互稱，此鹿頭山與『鹿首』同義，或疑即古白狼山。但《魏書》別載白鹿山祠於石城縣，而鹿頭山在定荒縣，當非一山。以定荒縣方位求之，當在今朝陽縣西境。

善玉山 《魏書·勿吉傳》：自和龍北二百餘里有善玉山。

按：和龍即今朝陽縣治其北二百餘里，當在今奈曼旗境。

九莊嶺 《水經注》：鮑邱水出禦夷北塞中，南流逕九莊嶺東。

孟廣峒 《水經注》：孟廣峒水出峒下，峒甚嵯峨，峨峨冠衆山之表。

孔山 《水經注》：道人溪水南流逕孔山西。又孟廣峒水西逕孔山南，上有洞穴開明。

按：《水經注》稱九莊嶺、孟廣峒及孔山，皆與鮑邱水即今潮河。相近。《方輿紀要》謂九莊嶺

在密雲縣北三十里，又以縣東北一百八十里古北口外之霧靈山為古孟廣峒。然《水經注》之九莊嶺，在鮑邱水初發源之時，尚不在邊內。至於霧靈山本即《水經注》之伏凌山，以音近而訛。《水經注》於鮑邱水所合之三城水下，已詳列之，亦不應又指為孟廣峒。是

《方輿紀要》之說，未可為據。今以《水經注》所列形勢審之，鮑邱水發源塞上，即逕九莊嶺東、似即指今豐寧縣屬上黃旗汛西南諸山而言。其所謂孟廣峒者，疑即今大閣兒東南之龍泉山。所謂孔山者，疑即今大閣兒東南之白雲洞。蓋潮河本流經龍泉山及白雲洞之東境，而龍溝水亦由此會入潮河。即以之當左入鮑邱之道人溪水。其方位亦相似，特古今異名，故附識於此。

丁原山 《水經注》：五渡水北出安樂縣丁原山。

按：北魏安州無安樂縣，疑即永樂之訛。詳見建置沿革門。山當在今承德府南境、灤平縣東南境。

石城山 《水經注》：石城川水出西南石城山。

按：北魏石城縣屬今建昌縣，山當在今建昌縣南境。

黃麋谷 《唐書·武后紀》：登封元年，張元遇、曹仁師、麻仁節等及契丹戰於黃麋谷。

按：此山《契丹傳》亦載之，于今方位無考。

都山 《唐書·元宗紀》：開元二十一年幽州副總管郭英傑及契丹戰於都山。《元一統志》：都

山在惠州東南二百里，其上林木暢茂。

按：元惠州地屬今平泉州。山當在平泉州東南境。《方輿紀要》又謂都山在臨黃南境，則

當在今赤峰縣北境，存以備考。

捺祿山 《唐書·元宗紀》：開元二十五年，張守珪及契丹戰於捺祿山，敗之。

按：《方輿紀要》謂捺祿山在朵顏衛境，今方位無考。

天門嶺 《唐書·安祿山傳》：討契丹至吐護真河，晝夜行三百里，次天門嶺。

按：《唐書·契丹傳》載此事曰大戰潢水南。古吐護真河即今老河，是天門嶺當在老河之北，潢河之南，赤峰縣境內。

松陁嶺 《唐書·地理志》：營州西北百里松陁嶺，其西奚，東契丹。曾公亮《武經總要》：興中府西北至松陁嶺百里。

按：唐營州在建昌、朝陽二縣境內，其奚與契丹分界，當在建昌縣。興中府為今朝陽縣，嶺當在今建昌、朝陽二縣間也。

冷陁山 《唐書·奚傳》：盛夏必徙保冷陁山。《契丹傳》：阻冷陁山以自固。

按：唐時冷陁為奚、契丹兩部接壤處。後燕慕容熙襲契丹至陁北，即冷陁之北。唐顯慶中以阿史德樞賓為冷陁道行軍總管，討叛奚。又延和初，幽州都督孫佺等及奚戰於冷陁山，皆指此。當在今平泉州建昌縣之北境。《方輿紀要》謂在潢水之南，黃龍之北，奚、契丹依阻此山以自固者是也。《唐書》又謂冷陁山直媯州西北。考唐初契丹之地，本在潢水左右，距媯州絕遠，即奚王牙帳亦附近土河與營州相接，而不在媯州。至遼初始以別部徙媯州，為西奚。《唐書》所稱冷陁直媯州西北者，蓋兩冷陁也。

摘星嶺 《唐書·契丹傳》：契丹入寇幽、薊，劉仁恭窮師逾摘星嶺討之。歲燎塞下草，使不

得留牧，馬多死。《五代史·契丹傳》：劉守光歲使人逾摘星嶺燒荒，契丹馬無所食。

按：《明一統志》謂摘星嶺在順天府西三百餘里。若在內地，又隔西奚一部，何由得困契丹，蓋未足為據。《方輿紀要》謂在大寧南境。

雙山 《遼史·地理志》：中京大定府有雙山。

按：遼中京在今平泉州，則雙山應在平泉州地。

九宮嶺 《遼史·地理志》：澤州有九宮嶺。《元一統志》：九宮嶺在惠州南一百五十里。

按：元之惠州即遼之澤州，為今平泉州地，則九宮嶺當在平泉州南境。《唐書·地理志》

漁陽郡下注：自古盧龍北經九荊嶺。盧龍塞在今潘家口外，九荊嶺在盧龍塞北，當即

《遼史》之九宮嶺也。

石子嶺 《遼史·地理志》：澤州有石子嶺。《元一統志》：石子嶺在惠州北八十里。

按：此當在今平泉州境。又考王曾《行程錄》曰過石子嶺，自此漸出山，七十里至富谷館，八十里至通天館，二十里至中京，與此方位相合。又《唐書·地理志》曰經九荊嶺、受米城、張洪隘，度石嶺，至奚王牙帳。唐之奚王牙帳，即遼之中京。度石嶺與奚王牙帳相近，當即《遼史》之石子嶺。《唐書》作石嶺也。

平頂山 《遼史·地理志》：高州有平頂山。《元一統志》：平頂山在高州北五里。

按：遼、元時之高州在今赤峰縣。今豐寧縣屬之正藍旗、鑲黃旗皆有平頂山，方位偏西，

乃遼北安州界，非高州境也。

黃柏山

《遼史·地理志》：武安州有黃柏嶺。

按：《遼史》武安州地屬今朝陽縣，嶺當在朝陽縣西境。

雕窠嶺

《遼史·地理志》：宋王曾《上契丹事》曰：思鄉嶺八十里至新館，過雕窠嶺、偏槍

嶺。

按：思鄉嶺今十八盤嶺，偏槍嶺今偏嶺，皆在灤平縣。雕窠嶺在思鄉嶺之北，偏槍嶺之南，亦當屬灤平縣境。

芹菜嶺

《遼史·地理志》：宋王曾《上契丹事》曰過墨斗嶺、度雲嶺、芹菜嶺。

按：墨斗嶺為今廣仁嶺，芹菜嶺當在廣仁嶺北。王曾《行程錄》墨斗嶺亦名度雲嶺，應是一山，故不復列。

牛山

曾公亮《武經總要》：北安州有牛山，亦作牛嶺。

按：今承德府本境灤平縣、豐寧縣，皆北安州地。《明成祖實錄》：永樂元年，命新昌伯唐雲引軍自小興州、大興州，東接牛嶺，會州、塔山、龍山諸處屯種。北勿出會州，西勿過千戶塞。則牛嶺當在興州之東，會州之南，為今平泉州南境。

鹿兒峽

《遼史·地理志》：宋王曾《上契丹事》曰：牛山館八十里至鹿兒峽館。

按：此牛山館當即《武經總要》所載北安州之牛山。鹿兒峽在牛山北八十里，亦當在平

泉州境。又考《方輿紀要》謂鹿兒峽在遵化州北塞外。明初常遇春追元兵，出遵化，度鹿兒嶺，至會州，即此。會州故城在今平泉州南二十里。則此嶺當更在會州之南。《方輿紀要》又謂，此嶺一名鹿路嶺，或訛為路兒嶺。《元史·順帝紀》至正二十四年，博羅特穆爾舊作字羅帖木兒，今改正。遣兵向闕，太子率侍衛兵東走古北口，趨興松，至路兒嶺，詔追及之，還宮，即此地也。

蝦蟆嶺 《遼史·地理志》：宋王曾《上契丹事》曰：至鹿兒峽館，過蝦蟆嶺。

按：此則嶺在鹿兒峽館之北，亦當在今平泉州境。

會仙石 曾公亮《武經總要》：北安州有會仙石。

按：此當在灤平縣、豐寧縣境。

器仗山 曾公亮《武經總要》：建州東南至器仗山三十里。

按：遼建州為今朝陽縣地。山當在今朝陽縣東南境。

唱叫山 《契丹國志》：中京東過小河，唱叫山道北，奚王避暑莊有亭臺。《元一統志》：唱叫

山在大寧縣東北三十里。

按：《明一統志》烏梁海下亦載此名，當在今平泉州境，與大寧故城相近。

奚王嶺、青嶺、瓢嶺 《金史·完顏宗翰傳》：宗翰至奚王嶺，與都統杲會，杲軍出青嶺，宗

翰軍出瓢嶺

按：宗翰與杲約于奚王嶺會議，在既取北安州之後。奚王嶺當在豐寧縣西境，青嶺、瓢嶺亦應相近。

呼碧峪 《元史·食貨志》：有龍山、呼碧峪。

按：呼碧峪與龍山相近，當在今朝陽縣境。

盤龍山 《元一統志》：盤龍山在大寧縣東南十里。

摩雲山 《元一統志》：摩雲山在大寧縣西南三十里，相傳常有雲氣覆其巔，故名。

香臺峰 《元一統志》：香臺峰在大寧縣西一百里，遼建昊天寺，金泰和六年杜元撰碑文云：

萬壑千崖，群峰爭出，咸不相讓，惟香臺峰玉立特秀，迥出霄漢之外，故以香臺名。

有福山 《元一統志》：有福山在大寧縣西北三十里，以其在福德之地故名。

按：元時大寧路大定縣為今平泉州治東北境，後改名大寧也。盤龍、摩雲、香臺、有福

四山，均應在今平泉州境。

溜石山 《元一統志》：溜石山在金源縣西南四十里。山有二峰，其形似駝。

按：《元史》載穆瑚黎

舊作木華黎，今改正。

進兵臨興中，先遣烏葉爾

舊作吾也而，今改正。

攻溜石山，蓋即此山

也。當在今平泉州東境。

乾山 《元一統志》：乾山在惠州西南二百五十里。遼、金采伐林木運入京畿，修蓋宮殿及梵

宇琳宮。元置提舉司。

按：此當在今平泉州最南境。

聖水山 《元一統志》：聖水山在高州東北三十里，上有一泉。

福德山 《元一統志》：福德山在高州西北三里。以其山居福德位，故名。舊名五福山。遼人謂之榆山。金大定間兵亂，此山見神兵解危，遂名福德山。有石洞號為集賢洞。有石環二丈，曾有仙遊，謂之會仙石。

按：元高州地屬今赤峰縣。聖水山、福德山俱當在赤峰縣境。

望京山 《元一統志》：望京山在松州東八十里。上有古寺，石佛像，又有石洞寶塔。

香臺山 《元一統志》：香臺山在松州南八十里。有石洞、石寺，周圍松樹茂林。

按：松州屬今赤峰縣。望京山、香臺山俱當在赤峰縣西南境。

五峰山 《元一統志》：五峰山在松州西南九十里。有古寺、石井。周圍松林。

按：此亦當在今赤峰縣境。又考今豐寧縣屬鑲白旗之東北有五峰山，為元興州、松州交界處，或為松州之五峰山，未可定也。

梓木山 《元一統志》：梓木山在和衆縣東南二十里。以山多梓木，故名。

按：元和衆縣地屬今建昌縣。山當在建昌縣南境。

熊山 《元一統志》：熊山在龍山縣南六十里。俗傳遼主臨山畋獵，獲一白熊，因號熊山。上有熊山寺。

石柱山 《元一統志》：石柱山在龍山縣南八十里。山中有方圓石柱。遼時有僧建寺於此，後寺廢，柱礎猶存。

按：元龍山縣地屬今建昌縣。熊山、石柱山俱當在建昌縣南境。

富山 《元一統志》：富山在龍山縣南一百三十里。一水通流，內有寺曰龍泉。

按：此亦當在今建昌縣境。今平泉州境有富山，與此方位不合。建昌縣境內諸山名為巴顏者頗多，亦莫定所在。

龍山 《元一統志》：龍山在龍山縣北八里。山如卧龍，俗傳曾有龍見，故名。

按：此與前燕慕容皝所築龍城東之龍山別。龍城東之龍山，在今朝陽縣境。此當在建昌縣境。

鞍山 《元一統志》：鞍山在龍山縣北十三里。勢若馬鞍，故名。

按：此亦當在今建昌縣南境。

雲寶山 《元一統志》：雲寶山在利州東四十里。山有穴竇，天欲陰雨，必有雲氣覆其巔，故名。

按：元利州地屬今建昌縣。山當在建昌縣南境。

金山 《元一統志》：金山在利州東南一百二十里。山有金洞，因以為名。絕頂有古寺，曰雲峰。

鳳凰山 《元一統志》：鳳凰山在利州南十三里。相傳鳳凰嘗止其上，故名。

按：金山、鳳凰山俱當在今建昌縣南境。今朝陽縣之鳳凰山即古龍山，乃元興中州地，與利州方位不合。

競秀山 《元一統志》：競秀山在興中州南三十里。

金山 《元一統志》：金山在興中州北三十里。

按：元興中州地屬今朝陽縣。競秀山、金山俱當在朝陽縣境。

獨山 《元一統志》：獨山在川州南一百四十里。其山屹然一峰，故名。

白雲山 《元一統志》：白雲山在川州北十五里，時有白雲覆其上，故名。

按：元川州地屬今朝陽縣。獨山、白雲山俱當在朝陽縣境。

荆山 《元一統志》：荆山在建州東北十里，其山多荆，故名。

按：建州地屬今朝陽縣。山當在朝陽縣南境。

丁山 《元一統志》：丁山在惠和縣南五十里。一峰如丁，故名。

按：元惠和縣地屬今建昌縣。山當在建昌縣北境。

大王山 《元一統志》：大王山在武平縣東八里。其山高聳，列岫崢嶸。

香爐山 《元一統志》：香爐山在武平縣南三十里。其山孤高，形若香爐，故名。山中有水一

泓，澄澈可愛，名曰聖水池。

按：元武平縣地屬今朝陽縣。大王山、香爐山俱當在朝陽縣境。

甄帽山 《明史·李文忠傳》：洪武七年，帥師攻大寧、高州，克之，追奔至甄帽山。

按：高州地屬今赤峰縣，山應在赤峰縣境。

[illegible]

水 一

塞垣以外，萬山合沓，而襟帶縈絡，當以水道證之。承德府屬全境諸水，按以《水經注》，名少相合。土俗所稱，原無準字，地居邊徼，載籍傳訛，故難印證也。自聖朝創建山莊，川涯河渚，半為輦道所經，我皇上駐蹕之暇，指示源流，若武列水、濡水之源，鉅制親裁，徵信萬古。編摩之臣，以今證昔，得有稟承。其水逕各州、縣境，難於按屬分隸，則提某大水為綱，而以所會某某諸小水附入，俾源流分合，一覽瞭然。其經流出各州、縣境者，則分注云舊某廳境，其經流不出各州、縣本境者，則云源出某山、某境，入某州、縣境，以清界址。其有古今異名，無從徵驗者，則引據舊本，書以闕疑，附之篇末，以備考稽。至木蘭境內之水，並依諸山之例，彙載圍場卷中。志水第十。

熱河 有三源：一出圍場東南界察罕陀羅海之西，固都古爾卡倫之南，在熱河行宮東北二百餘里，為西源。合平頂山南諸小水，南流逕豐寧縣

即四旗廳。

屬察哈爾正藍旗境，屈曲南流，逕固

都爾呼達巴罕，名固都爾呼河，又西南流，至中關行宮之東。一出平泉州

即八溝廳。

屬喀喇沁右翼

西境默沁達巴罕西之玳瑁溝，在喀喇沁右翼西一百餘里，當平泉州治西北境，為中源。初名

默沁河，西南流逕承德府

即熱河廳。

東北之茅溝汛境，名茅溝河，至中關之東與固都爾呼河合而南

流。一出喀喇沁右翼西南境霍爾霍克達巴罕西之三道溝，在喀喇沁右翼西南一百二十餘里，

亦當平泉州治西北境，為東源，名賽音河。西南流入承德府東北境，有溫泉注之，又西與固都爾呼河會。三源合而西南流，逕黃土坎行宮及釣魚臺行宮之東，又西南流，環避暑山莊之東，行宮內又有溫泉流出注之，始名熱河。南流折而東，復折而南，至下營子入灤河，即古武列水。

《水經注》：武列水三川派合，西源右為溪水，亦曰西藏水，東南流，出溪，與蟠泉水合。西藏水又西南流，東藏水注之，水出東溪。一曰東藏水，西南流出谷，與中藏水合，水導中溪，南流出谷，南注東藏水，故目其川曰三藏川，水曰三藏水。東藏水又南，右入西藏水，亂流，右會龍泉水，又東（二）南流，與龍芻水合，又東南流逕列溪，謂之武列水。東南歷石挺下，其水東合流入濡。

按：今熱河即武列水。固都爾呼河、茅溝河賽音河即古三藏水。至溫泉會流之後，始名熱河。臣等恭讀《御製熱河考》，於熱河、濡水之分源，辨證精詳，並審晰《鄭注》三川先後合流之舛誤，源流洞悉，曠若發蒙，知道元當日未得躬親目睹，故言之不精詳，不足徵信也。茲仰承聖訓，垂示永久，爰約舉鄭注原文以為緣起云。

## 御製文

### 熱河考 戊子

考水源而不親履其地，晰其支派、脈絡分合之由，雖博綜載籍，稽諸故老之流傳，不能參互